

Inatsisissatut siunnersuummut oqaaseqaatit

Oqaaseqaatit nalinginnaasut

1. Inatsisissatut siunnersuutip tunngavia

Aallaqqaasiut

Avaleraasartoorniarneq Kalaallit Nunaanni 2011-imi misiligummik aallartinneqarpoq.

2011-mi aalisakkanik suliffissuit avaleraasartoorniarnissamut aalisariutissanik annikitsuinnarmik atugassaqartillugit, avaleraasartuut 51 tonsit pisarineqarput. 2012-mi annertunerulaartunik atortussaqsarimavoq, avaleraasartuullu 5.219 tonsit pisarineqarput. 2013-mi aatsaat taama amerlatigisunik 18-usunik aalisariutinik avaleraasartoorniarnissamut Kalaallit Nunaanni atuisoqarmat, avaleraasartuut pisarineqartut tamarmiusut 53.841 tonsiupput (kisitsisaagallartoq).

Avaleraasartoorniarnermi isumalluutinik atuinnermut akitsuut siunnersuutikkut atuutilersinneqassaaq. Avaleraasartuut akitsuuserneqarnerisigut inuiaqatigiit aalisakkanik pisuussutitsinnit pissarsissunnerunissaat qulakkeerniarneqarpoq.

Avaleraasartuut akitsuutaannik atuutilersitsinissaq, 2014-imi 90 mio. kr.-inik isertitsissutaassaaq, 2014-imut aningaasanut inatsisissap pingajussaaneerneqarnerani Inatsisartut aalajangerpaat.

2014-imi aningaasanut inatsimmi kontumut pingaarnermut 24.11.26-mut (avaleraasartuut akitsuutaat) oqaasertaliunneqartumi aalajangersarneqarpoq qaammatsiutit malillugit ukiumi 2014-imi aalisarnermi avaleraasartuunut kiilumut akitsuutip 1,50 kr.-iusup akilersinneqarnissaa Naalakkersuisunut piginnaatitsissutigineqarpoq.

Oqaasertaliussap aningaasanut inatsimmut ilanngunneqarneratigut, akitsuummik akiliisitsinissamut periarfissaqarnissap qulakkeerneqarnissaa siunertarineqartoq oqaaseqaatini allassimavoq, tassa akitsuut pillugu inatsisivimmik akuersissuteqartoqarnissaata tungaanut.

Una akitsuut pillugu inatsisivissatut siunnersuutaavoq.

Avaleraasartoorniarneq

Kalaallit Nunaanni avaleraasartoorniarneq kilisaatit tunisassiorfiutigisut atorlugit maannamut pisarpoq, tunisassiat nunanut allanut, pingaartumik Europap kangianut russinullu nioqqutigineqartussat taakkunani naammassillugit suliarineqartarlutik.

Suliffeqarfiit nunatsinneersut pisassiissutinik nammineerlutik atuinissartik pisinnaasamikkut saperluinnaraat 2013-imi misileraalluni aalisarnermi misilittakkat takutippaat. Taamaammat misileraalluni aalisarnissami pisassinneqartut ilaasa pisassatik, aalisarnermik suliffeqarfiutillit nunanit allaneersut isumaqatigiissuteqarfigalugit taakkununga aalisartissimavaat. Isumaqatigiissutit taakku imarisamikkut qanorlu issutsimikkut assigiinngisitaarput, isumaqatigiissutilli assigiissutaat tassaavoq nunatsinni suliaasaqartitsinikkut pisinnaasatigullu ineriartortitsinikkut annikitsuinnarmik sunniuteqaramik.

Nunatsinni suliaasaqartitsinissap pisinnaasatigullu ineriartortitsinissap 2014-imi misileraalluni aalisarnissamut atatillugu annertusinissaat naatsorsuutigineqarpoq. Soorlumi aamma aalisarnermik suliffeqarfiit anginerit ilaat aalisariutissaminik nutaamik pisisimasoq.

Avaleraasartoorniarnep isumalluutinik atuinermut akitsuummik akitsuusiiffigineqarnissaq nammassinnaassagaa nalilerneqarpoq.

2. Inatsisissatut siunnersuutip imarisaa

Inatsisissatut siunnersuutip kingunerissavaa suliffeqarfiit inuillu avaleraasartoorniarnissamut pisassinneqarsimasut pisamik akitsuutaannik landskarsimut akiliisussanngortinneqarnissaat avaleraasartuumut kiilumut 1,50 kr.-nik.

Aningaasanut inatsimmi akitsuutip angissusaa avaleraasartuumut kiilumut 1,50 koruuniusup attatiinnarneqarnissaa taamaalilluni siunnersuutaavoq.

Avaleraasartuut Kalaallit Nunaanniittut pinngortitamit isumalluutissatut inuiaqatigiit pigisaattut isigineqartariaqarput, isumalluutinillu taakkuninnga atuneq siunissaq ungasinnerusoq eqqarsaatigalugu inuiaqatigiinnut kalaallinut aningaasatigut sapinngisamik iluanaarutaanerpaamik ingerlanneqartariaqarpoq. Avaleraasartuut tamatta isumalluutitta inuiaqatigiinnut annertunerpaamik iluanaarutaanissaat avaleraasartuut akitsuutaata qulakkiissavaa.

Akitsuummik atuutsitsinissaq

2014-imi aningaasanut inatsimmi kontumut pingaarnermut 24.11.26-mut (avaleraasartoorniarnep akitsuutaa) oqaasertaliunneqartumi aalajangersarneqarpoq qaammatsiutit malillugit ukiumi 2014-imi aalisarnermi avaleraasartuunut kiilumut akitsuutip 1,50 kr.-iusup akilersinneqarnissaa Naalakkersuisunut piginnaatitsissutigineqartoq.

Oqaasertaliussap aningaasanut inatsimmut ilanngunneqarneratigut, akitsuummik akiliisitsinisamut periarfissaqarnissap qulakkeerneqarnissaa siunertarineqartoq oqaaseqaatini allassimavoq, tassa akitsuut pillugu inatsisivimmik akuersissuteqartoqarnissaata tungaanut.

Tassa Naalackersuisunut piginnaatitsissut taaneqartoq inatsit una akuersissutigineqarpat atorrunnaassaaq.

Atuutsitsinissaq pillugu aalajangersakkat, qalerallit akitsuutaat pillugu inatsimmi atuuttumi aalajangersarneqarsimasut, ataaseq kisiat pinnagu aammattaaq avaleraasartuut akitsuutaannut atuutissapput.

Pineqanngitsutuaq tassaavoq akitsuutip akilernerneqarnissaata misileraalluni qaleralinniarnermi tamakkiisumik ilaannakuusumilluunniit pinngitsoortinneqarsinnaanerata Naalackersuisunit akuersissutigineqarsinnaanera. Taamatut akiliinngitsoortitsisinnaanerup avaleraasartuunut tunngatillugu atuutsinneqarnissaa naleqquttuusorineqanngilaq, Kalaallimmi Nunaanni avaleeraasartoorneq misileraalluni aalisarnerinnavittut maannamut sulii ingerlanneqarmat.

Akitsuummik akiliisussaataitaneq piffissami pisarineqarfiani atuutilissaaq, soorlu qalerallit akitsuutaannut taamaattoq. Aalisarneq pisassiissutitigut aalajangersaaffiunngitsoq, soorlu nunat tamat imartaanni aalisarneq akitsuusersugaanngilaq.

Akitsuut suliffeqarfiup pisaasa ilaannit Kalaallit Nunaanni tunitsivinnut tunisassiorfinnulluunniit tulaaneqartussaanningsunit naatsorsorneqassaaq. Avaleraasartuunut tunngatillugu tulaassisussaataitaneq taanna aalisarneq pillugu inatsimmi maannakuugallartoq aalajangersarneqanngilaq. Taamaammat tulaassisussaataitaneq taamaattoq atuutilersinneqartinnagu avaleraasartuut pisarineqartut tamarmik avaleraasartuut akitsuutaannik akitsuuserneqartassapput.

Akitsuummik akiliisussaataitaneq tunngaviatigut atuuppoq pisassiissutinut imartani Kalaallit Nunaata oqartussaaffigisaani aalisarneqartussatut akuersissutigineqartunut, aamma pisassiissutinut imartani nunat allat oqartussaaffigisaanni aalisarneqartussatut Naalackersuisunit akuersissutigineqartunut. Naalackersuisut, aalisarneq pillugu nunamut allamut isumaqatigiissut naapertorlugu, imartami nunap taassuma allap oqartussaaffigisaani aalisarnissamut pisassiissutinik tunniussisinnaatitaappata, pisassiissutinik taamaattunik akuersissuteqarnermut atatillugu landskarsimut akitsuummik akiliuteqartoqassaaq.

Suliffeqarfiit nunanit allaneersut imartani Kalaallit Nunaata oqartussaaffigisaani aalisarsinnaanerata pillugu nunat tamat akornanni isumaqatigiissuteqartoqarsimappat, soorlu Europæiske Unionimut (EU) isumaqatigiissummik, isumaqatigiissutit taamaattut akitsuummik akiliisus-

saatitaanermi pineqartunut ilaangillat, akiliutaajunnartut isumaqatigiissummi aalajangersarneqartarmata.

Akitsuummik akiliisussaataasooq tassaavoq suliffeqarfik inulluunniit avaleraasartooriarnisamat pisassinneqartoq. Akitsuut kvartalikkaartumik naatsorsorneqarlunilu akilerneqartassaaq.

Akitsuut kvartalip naanerata kingorna qaammatip tulluuttup ulluisa kingullersaanni akileraaruseriffimmut nalunaarutigineqarlunilu akilerneqassaaq. Suliffeqarfiup akitsuut piffissaagallartillugu akilinngippagu, sivikinnerusumik piffissaqarluni akiliisarnissaq akileraaruseriffiup peqqussutigisinnaavaa, soorluttaaq akitsuutit akilerneqarnissaannut qularnaveeqqusiisoqarnissaa piumasarineqarsinnaasoq.

Aammattaaq inatsisissatut siunnersuut Akileraaruserinermik ingerlatsineq pillugu Inatsisartut inatsisaannut attuumassuteqartinneqassaaq. Akileraaruserinermik ingerlatsineq pillugu Inatsisartut inatsisaat maleruagassanik, Qalerallit avataasiorluni aalisarnermi pisarineqartut akitsuutaat pillugu Inatsisartut inatsisaannut (matumani allannortinniarneqartoq ima avataasiorluni Qalerallit avaleraasartuullu pisat akitsuutaat pillugu Inatsisartut inatsisaat) atatillugu nakkutilliineq, kingusinaarluni akiliinermi ernialersuineq, isumakkeerineq ilaallu ilanngullugit pillugit akileraaruseriffiup suliasamik naammagittaalliummillu suliaqarnerani pingaaruteqartunik ilaatigut imaqarpoq. Tassa imaappoq Qalerallit avataasiorluni aalisarnermi pisarineqartut akitsuutaat pillugu Inatsisartut inatsisaata atuutsinneqarnera, akileraarutit akitsuutillu pillugit inatsisitut allatuulli Akileraaruserinermik ingerlatsineq pillugu Inatsisartut inatsisaanni maleruagassat malillugit ingerlanneqassaaq, aalajangersakkat immikkut ittut ingerlatsinermut pingaarutillit Qalerallit avataasiorluni aalisarnermi pisarineqartut akitsuutaat pillugu Inatsisartut inatsisaanni aalajangersarneqarsimangippata.

Siunnersuutip inatsimmut atuuttumut sanilliunna	
<i>Oqaaseqaatit atuuttut</i>	<i>Siunnersuut</i>
	§ 1 Qalerallit avataasiorluni aalisarnermi pisarineqartut akitsuutaat pillugu Inatsisartut inatsisaat nr. 11, 3. december 2012-imeersoq, Inatsisartut inatsisaannik nr. 9, 1. januar 2014-meersukkut allannortinneqartumi makku allannguutigitinneqarput:
Qalerallit avataasiorluni aalisarnermi pisarineqartut akitsuutaat pillugu Inatsisartut inatsisaat	1. Inatsisip taaguutaa ima oqaasertalerneqassaaq: ”Qalerallit aammalu avaleraasartuut

	avataasiorluni aalisarnermi pisarineqartut akitsuutaat pillugu Inatsisartut inatsisaat.”
<p>§ 1 <i>Imm. 1.</i> Suliffeqarfiit aamma inuit avataasiorluni qaleralinniarnissamut pisassinneqarsimasut pisamik ilaasa, aalisarneq pillugu inatsit naapertorlugu Kalaallit Nunaanni tunitsivimmut tunisassiorfimmulluunniit tunineqartussaannngitsut landskarsimut akitsuutaannik, inatsimmi matumani aalajangersakkat naapertorlugit akiliissapput.</p>	<p>2. § 1, imm. 1, ima oqaasertaqassaaq: “§1. Suliffeqarfiit aamma inuit avataasiorluni qaleralinniarnissamut avaleraasartoorarnissamullu pisassinneqarsimasut pisamik ilaasa, aalisarneq pillugu inatsit naapertorlugu Kalaallit Nunaanni tunitsivimmut tunisassiorfimmulluunniit tunineqartussaannngitsut landskarsimut akitsuutaannik, inatsimmi matumani aalajangersakkat naapertorlugit akiliissapput.”</p>
<i>Akitsuut</i>	<p>3. § 2-p kingornagut qulequtaq ima oqaasertaqassaaq: ”<i>Qalerallit akitsuutaat</i>”</p>
<p>§ 3 <i>Imm. 1.</i> Akitsuut qaleralimmut kiilumut ataatsimut 2,50 koruuniuvoq.</p>	<p>4. § 3, imm. 1, ima oqaasertaqassaaq: ”§ 3. Akitsuut qaleralimmut kiilumut 2,50 koruuniuvoq, takuulli imm. 2”</p>
<p>§ 3 <i>Imm. 2 (punktum siulleg).</i> Akitsuut, tak. imm. 1, qalerallit akiisa uuliap danskit koruuninngorlugit akianut sanilliullutik allanngorarnerisa angeqqataannik kvartalikkaartumik aaqqiivigineqartassaaq.</p>	<p>5. § 3, imm. 2, punktum siulleg, ima oqaasertaqassaaq: ”<i>Imm. 2.</i> Akitsuut qaleralimmut kvartalikkaartumik aaqqiivigineqartassaaq kvartalip siuliani akitsuutip angissusia tunngavigalugu aammalu qalerallit akiisa uuliap danskit koruuninngorlugit akianut sanilliullutik allanngorarnerisa angeqqataannik.”</p>
	<p>6. § 3-p kingornagut qulequtaq nutaaq ilanngunneqassaaq: ”<i>Avaleraasartuut akitsuutaat</i>”</p>
	<p>7. Qulequttap nutaap kingornagut ilanngunneqassaaq: ”§ 3a. Akitsuut avaleraasartuumut, angallat Kalaallit Nunaanni angerlarsimaffeqartutut nalunaarsorneqarsimasoq atorlugu pisarineqartumut kiilumut 1,50 koruuniuvoq. <i>Imm. 2.</i> Akitsuut avaleraasartuumut,</p>

	angallat Danmarkimi, Savalimmiuni nunaniluunniit allani angerlarsimaffeqartutut nalunaarsorneqarsimasoq atorlugu pisarineqartumut kiilumut 1,50 koruuniuvoq.
<p>§ 7 Naalackersuisut akitsuummik akiliinnginnissamik qinnuteqaat akuerisinnaavaat misileraalluni aalisarnissaq peqassutsimut imaluunniit inuussutissarsiornermut pingaaruteqartoq akuersissutigineqarsimappat, aammalu akiliinnginnissamik akuersinerup aningaasatigut sunniutissai annertunngippata.</p>	<p>8. § 7 ima oqaasertaqassaaq: ”§ 7. Naalackersuisut qalerallit akitsuutaannik akiliinnginnissamik qinnuteqaat akuerisinnaavaat, misileraalluni aalisarnissaq peqassutsimut imaluunniit inuussutissarsiornermut pingaaruteqartoq akuersissutigineqarsimappat, aammalu akiliinnginnissamik akuersinerup aningaasatigut sunniutissai annertunngippata.”</p>
	<p style="text-align: center;">§ 2</p> <p>Inatsit 1. maj 2014-imi atortuulissaaq, atuutissallunilu avaleraasartuunut 1. maj 2014-imi kingusinnerusumiluunniit pisarineqartunut. 2014-imi aningaasanut inatsimmi kontumut pingaarnermut 24.11.26-mut oqaasertaliunneqartumi nr. 1-imi aalajangersagaq taassuma ilutigisaanik atorunnaarsinneqassaaq.</p>

3. Pisortanut aningaasatigut allaffissornikkullu sunniutissai

Akitsuutip avaleraasartuunut kiilumut 1,50 kr.-inut angissusilerneqarneratigut landskarsip ilanngaattissat ilanngaatigineqannginneranni 90 mio. kr.-it missinginik isertitsinissaa naatsorsuutigineqarpoq soorlu tamanna 2014-mut aningaasanut inatsimmi naatsorsuutigineqartoq.

90 mio. koruuninik isertitaqarnissamut piunasaqaataavoq, 2014-mi avaleraasartuut 2013-misulli annertutigisut pisarineqassappata, ukiumi taaneqartumi 60.000 tons-it pisarineqarput:

60.000.000 kiilu * 1,50 kr./kiilumut = 90 mio. kr.

2014-mi avaleraasartuunik pisassiissutigineqartussat 100.000 tons-inut qaffanneqarnikuupput. Pisassiissutigineqartut tamakkerlugit pisarineqarpata, isertitassa 150 mio. koruuninut qaffassapput:

100.000.000 killu * 1,50 kr./kiilumut = 150 mio. kr.

Kommuunit ilanngaattissat ilanngaatiginnginneranni akileraarutit nalingisa ¾-ta missaanik taartisissutigissavaat.

Suliassap maannakkut periarfissarititaasut iluanni allaffissornikkut isumagisinnaanissaa Aki-leraartarnermut Aqutsisoqarfiup naatsorsuutigaa.

A-skatimut tunngatillugu aningaasaqarnermut kingunissai sukumiinerusumik nalilersuiffigineqarsinnaasimangillat, tassami avaleraasartuunut pisassiissutit ullumikkut agguanneqarsimangillat aammattaarlu pisassiissutit sulii atorluarneqalersimanatik.

4. Inuussutissarsiutinik ingerlataqartunut aningaasatigut allaffissornikkullu sunniutissai

Akitsuutip angissusaa pillugu oqallinnermi isummersuutit saqqummerput, Kalaallit Nunaanni avaleraasartoornerup akitsuut kiilumut 1,50 koruuniusoq nammassinnaassagaa.

Inunnut suliffeqarfinnullu, inatsisissatut siunnersuummi § 1, nr. 2-mi pineqartunut aningaasatigut allaffissornikkullu sunniuteqartussaavoq. Taakkunungattaq kingunerissavaa akitsuutit akilerneqarnissaanni allaffissornertaqartussaanera. Umiarsuaatileqatigiiffiit inuttaminnut, akitsuutip ilaanik nammatsitsinissaat ilimagineqarsinnaavoq.

5. Avatangiisinut, pinngortitamut inuillu peqqissusiannut sunniutissai

Siunnersuut avatangiisinut pinngortitamulluunniit sunniuteqangaassangatinneqanngilaq. Siunnersuuttaaq inuit peqqissusiannut sunniuteqassangatinneqanngilaq.

6. Innuttaasunut sunniutissai

Siunnersuut innuttaasunut allaffissornikkut sunniuteqassangatinneqanngilaq.

Kilisaatit inuttalluunniit nunatsinneersut Kalaallit Nunaanni avaleraasartoornermi maannakkorpiaq annikitsuararsuaannarmik peqataammata, tamatuma innuttaasunut sunniuteqarnerlunnissaa naatsorsuutigineqanngilaq.

Akerlianik ilimagineqarpoq avaleraasartuunut akitsuut kalaallinik sulinerulertitsiumaartoq akitsuutip aaqqissuussaannermigut kajumissaarineratigut, aammalu avaleraasartuunik pisassiinerit siunertaatigut aaqqissuussaaneratigut.

7. Sunniutissai pingaarutillit allat

Inatsisissatut siunnersuut allanik pingaarutilinnik sunniuteqassanganneqanngilaq.

8. Oqartussaasunik kattuffinnillu il.il. tusarniaaneq

Siunnersuut piffissami 9. december 2013-imiit 6. januar 2014-imut ukununga tusarniaassutigineqarpoq:

KANUKOKA, Kalaallit Nunaanni Sulisitsisut Peqatigiiffiat, KNAPK, NUSUKA, SIK, KPMG Grønland, Deloitte, Grønlands Revisionskontor, Inuusutissarsiornermut, Aatsitassaqaarnermut Suliffeqaarnermullu Naalakkersuisoqarfik, Aalisarnermut, Piniarnermut Nunalerinermullu Naalakkersuisoqarfik aammalu Ineqarnermut Naalakkersuisoqarfik.

Inatsisissamut siunnersuut oqaaseqaatinik ilalik aammattaaq tamanut saqqummiunneqarpoq www.naalakkersuisut.gl -mi, internetikkut nittartakkakkut tusarniaanernut inissillugu.

Tusarniaanermut killiliussap naanerani Kommuneqarfik Sermersuumit, Kommune Kujallermit, Kalaallit Nunaanni Sulisitsisut Peqatigiiffiat-imit, KNAPK-imit aammalu, Inuusutissarsiornermut, Aatsitassaqaarnermut Suliffeqaarnermullu Naalakkersuisoqarfimmit tusarniaanermut akissutit tiguneqarput.

Tusarniaaneq oqaaseqaatinik tulliullugu taaneqartunik kinguneqarsimavoq:

Kommuneqarfik Sermersuup (KS) nalinginnaasumik isumaqatigisinnaavaa ataatsimut isumalluummut avaleraasartuutut ittumut inuiaqatigiit akitsuusiinerat. KS-ili isumaqarpoq, aallaqqaataanit avaleraasartooriarnermut akitsuusiineq aalisarnermut isumalluarnaraluartumut annertuumik unammilligassanik kinguneqartitsinnaasoq, tassami aalisarnermut annertuumik aningaasartuuteqarfiusumi peqataaniarluni aningaasaliiniartut soqutiginninnerannut akitsuut akornusiisnaammat.

Assingusumik Kommune Kujalleq (KK) isumaqarpoq naleqqutinngitsoq avataasiorluni aalisarnikkut inuusutissarsiornerup akitsuutininik annertunerusunik akiligassinneqarnissaat, tassami isumaqarfigineqarmat, avataasiorluni aalisarnikkut inuusutissarsiorlut qaffasissunik aningaasartuuteqareermata assersuutigalugu ikummatissamut, nassiussat akiinut, sillimmatinut aammalu nalinginnaasumik aserfallatsaaliinernut. Aammattaaq KK isumaqarpoq,

Kalaallit Nunaata kujataani aalisarnermut inuussutissarsiorneq annertungaatsiartumik eqqorneqassasoq, tassami matumani annerusumik pineqarmat avataasiorluni qaleralinniarluni, saarullinniarluni aammalu avaleraasartoorliarluni aalisarneq.

Kiisalu aamma Kalaallit Nunaanni Sulisitsisut Peqatigiiffiat (GA) isumaqataavoq, inuiaqatigiit isumalluutaat sapinngisamik annertuunik aningaasatigut atugarissaarnermut tapiissuteqartarnissaat, kisiannili tamatumunnga ilutigalugu aalisarnermik inuussutissarsiornermut pitsanngorsakkanik patajaatsunillu atugaqartitsinissaq pisariaqartinneqartoq.

Naalakkersuisut nalilerpaat, avaleraasartuunik aalisarnermut akitsuutinik atulersitsinerup kingorna aamma avaleraasartoorliarnissamut suli naammattumik aningaasarsiornikkut pilerinassuseqassasoq.

KS oqaaseqarpoq, avaleraasartuut uumasooqatigiittut Kalaallit Nunaata kangiaata imartaanut tamaaniittuaannartussatut pisimasutut taassallugit, aammalu taassuma qanoq annertutigisumik Kalaallit Nunaata imartaanut allanut siaruaassimanersoq, aammalu eqqoriaruminaassasoq, siunissaq ungasinnerusoq eqqarsaatigalugu avaleraasartoorliarneq pissarsissutigineqarsinnaanersoq pillugu suli siusippallaartoq oqaatigissallugu. KS-p kajumissaarutigaa 2014-mi aalisarfiusumi aalisakkanik suliffissuit suleqatigalugit ineriartorneq sukumiisumik malinnaaffigineqassasoq.

GA isumaqarpoq avaleraasartoorliarnermut akitsuusersuineq qanittuinnaq isigalugu pinerusoq, akerlianik pisariaqarpoq Kalaallit Nunaata imartaani qanoq annertutigisumik avaleraasartooqarnermoq uppersarsassallugu.

Naalakkersuisut siunissami avaleraasartooqaleriartornera qanimut malinnaaffiginiarpaat. 2014-mi avaleraasartoorliarnermut atatillugu aalisakkanik suliffissuit suleqatigalugit Kalaallit Nunaata imartaani qanoq annertutigisumik avaleraasartooqarnera uppersarsarneqassaaq.

KS-p inatsisissatut siunnersuummi pilerinarsaanissamut ilusilersuut isumaqatigaa, pineqartumi kalaallit pigisaannik angallatinik atuinissamik kalaallinillu inuttaqartitsinissaq kaammattuutigineqarpoq kajumissaarutigineqarlunilu avaleraasartoorliarnermut atatillugu nalinginnaasumik immikkut siunnerfigineqassasoq kalaallinik sulisoqarnissap inuttaqarnissallu qulakkeernissaa pillugu. KS-ip tamatumunnga atatillugu inassutigaa avaleraasartoorliarneq pillugu pikkorissaanerit aammalu aalisartunut aalisarnermi peqataarusuttunut imaani sillimaniarneq pillugu pikkorissaanerit pilersinneqassasut.

Taamatutaaq GA-p isumaqatigaa akitsuutip assigiinngiaartuutinneratigut pilerinarsaaneq pilersinneqartoq pillugu, kisiannili uparuarlugu, avaleraasartooriarnermut atatillugu kalaallit aalisariutaatillit aammalu inuttaasut akornanni piginnaasanik ineriartortitsinissamik pisariaqartitsisoqarnera.

Sulisunik qaffasaanissamut pisortanit aningaasaliissuteqarnissamut pisariaqartitsineq periarfissallu ingerlaavartumik Naalackersuisut nalilersorpaat. Assigiinngisitaartumik akitsuusiisarnissaq nalilersuereernikkut siunnersuummit peerneqarpoq.

GA isumaqarpoq naalackersuineramik suliallit inuussutissarsiummillu ingerlataqartut akornanni kinguneqartussamik iliuuseqaqatigiinniartoqarsimanngitsaq avaleraasartooriarnermut akitsuummik atulersitsinermut atatillugu, siusinnerusukkut ileqqusut malinnagit misileraalluni aalisarnermut akitsuusiisoqarsimammat.

Naalackersuisut kissaatigaat aalisarnermik inuussutissarsiteqartunik kinguneqartussamik iliuuseqaqatigiinniarnissaq, matumunnga ilanngullugu avaleraasartooriarnermut akitsuut pillugu, aammalu inuussutissarsiummik ingerlataqartut tamanna pillugu ingerlaavartumik oqaloqatigiinnermut ilanngunneqartarnissaat.

GA-p siunnersuutigaa, akitsuutip angissusaasa naleqqussarneqarsinnaasariaqarnerat, avaleraasartooriarneq annikitsuinnarmik pissarsiffiusimatillugu.

Kiilukkaartumik akitsuusiisarneq pineqarmat, annikinnerusunik avaleraasartuunik pisaqartoqartillugu annikinnerusumik akitsuummik akiliisoqartassaaq. Taamaattumik pisariaqartinneqarsimanngilaq taama ittumik naleqqussaasoqartarnissaq. Taamatutaaq ukiuni aggersuni siunertarineqarpoq akitsuusiisarnermut inatsisip maanna atuuttup aalisarnerup iluani isumalluutinik atuinermut akitsuusiisarnissamik ataatsimut inatsisiliamik taarsernissaa. Tassunga atatillugu naleqqussaariaaseq atulersinneqarsinnaavoq, avaleraasartooriarnermut aamma atuussinnaasumik tammanna naleqquppat.

GA-p siunnersuutigaa oqaaseqaat siunnersuummi § 3a, imm. 3-mi taaneqartoq ”bareboat charter” ersarissarneqassasoq, kiisalu bareboat charter-imik atuisinnaaneq qanoq iliorluni nakkutilliisarnissaq ersarissarneqassasoq.

Bareboat charter-inut immikkut akitsuusiisarnissamut siunnersuut peerneqarpoq.

GA-p oqaatigaa oqaaseqaatini nalinginnaasuni, qupp. 4, imm. 7, punktummit pingajuani oqaaseqatigiit kingunerisariaqaraat pisassiissutit tunineqarsinnaasut pineqarnissaat, tamannali pineqanngilaq.

Oqaaseqaat peerneqarpoq.

KNAPK avaleraasartoornermut akitsuummik atulersitsinissamut akerliliissuteqanngilaq.

Inuussutissarsiornermut, Aatsitassaqaarnermut Suliffeqaarnermullu Naalackersuisoqarfiup tusarniaanermut akissutaa siunnersuummut toqqaannartumik oqaaseqaatinik imaqanngilaq

Inatsisissatut siunnersuummi aalajangersakkanut ataasiakkaanut oqaaseqaatit

§ 1-imut

Nr. 1-imut

Inatsisip avaleraasartuunut taamatullu aamma qaleralinnut atortuulersinneqarnerata kingunerisaanik inatsisip taaguutaa allanngortillugu aalajangersakkami iluarsineqarpoq.

Nr. 2-mut (§ 1, imm. 1)

Aalajangersakkap kingunerissavaa inatsisip atuuffiata suliffeqarfinnut inunnullu avataasiutinik avaleraasartoorarnissamut pisassissineqarsimasunut aamma atuunnissaa. Aamma maannamutuut pineqarput suliffeqarfiit inuillu avataasiutinik qaleralinniarnissamut pisassinneqarsimasut.

Akitsuut suliffeqarfiup inuulluunniit pisaasa ilaannit Kalaallit Nunaanni tunitsivinnut tunisasiorfinnulluunniit tulaanneqartussaangitsunit naatsorsorneqassaaq. Avaleraasartuunut tunngatillugu tulaassisussaataaneq taanna maannakkugallartoq aalajangersarneqanngilaq. Taamaammat tulaassisussaataaneq taamaattoq atuutilersinneqartinnagu avaleraasartuut pisarineqartut tamarmik avaleraasartuut akitsuutaannik akitsuuserneqartassapput.

Nr. 3-mut

Inatsip avaleraasartuunut taamatullu aamma qaleralinnut atortuulersinneqarnerata kingunerisaanik inatsimmi qulequttap allanngortillugu aalajangersakkami iluarsineqarpoq.

Nr. 4-mut (§ 3, imm. 1)

Aalajangersagaq imaqarpoq imm. 2-mut innersuussinermik ersarissarniarlugu, qaleralinnut akitsuut ingerlaavartumik naleqqussarneqarsinnaanera pillugu.

Nr. 5-mut (§ 3, imm. 2, punktum siulleq)

Aalajangersakkap ersarissarpaa, kvartalikkaartumik qaleralinnut akitsuummik naleqqussaaneq pisassasoq, kvartalip siuliani akitsuutip angissusaa atuussimasoq aallaavigalugu.

Nr. 6-mut

Aalajangersagaq iluarsineruvoq, tassami taanna tunngavigalugu inatsimmi qulequtaq ikkunneqarmat inatsit annertusineqarmat avaleraasartuut qalerallillu pineqalernerannik kinguneqartumik.

Nr. 7-imut (§ 3a)

Avaleraasartooriarnerup isumalluutini atuinermut akitsuuserneqarnissaa siunnersuutikkut atuutilersinneqassaaq avaleraasartuunut kiilumut 1,50 koruunit, apeqqutaatinnagu avaleraasartooq angallat Kalaallit Nunaanni angerlarsimaffeqartutut nalunaarsorneqarsimasooq atorlugu pisarinqarsimasooq, tak. § 3a, imm. 1, imaluunniit avaleraasartooq angallat Danmarkimi, Savalimmiuni nunaniluunniit allani angerlarsimaffeqartutut nalunaarsorneqarsimasooq atorlugu pisarinqarsimasooq, tak. § 3a, imm. 2.

Avaleraasartuut akitsuutaata nalimmassarneqartarnissaa pisariaqarsorineqanngilaq, tassami misileraalluni aalisarnej pineqarmat.

Nr. 8-imut (§7)

Siunnersuutip § 7-imut maanna atuuttumut sanilliullugu imaraa aalajangersakkap taamaallaat qalerallit akitsuutaannut tunngasuunerata erseqqissarnera.

Naalackersuisut akitsuummik akiliisinneqannginnissamik qinnuteqaammik akuerinnissinnaanerisa avaleraasartooriarnermut atuutinnginnissaa taamaaliornikkut qulakkeerniarneqarpoq.

§ 2-mut

Siunnersuutaavoq inatsit 1. maj 2014-imi atortuulissasooq, atuutissasorlu avaleraasartuunut 1. maj 2014-imi kingusinnerusumiluunniit pisarinqartunut.

2014-imi aningaasanut inatsimmi kontumut pingaarnermut 24.11.26-mut oqaasertaliunneqartumi nr. 1-imi aalajangersagaq taassuma ilutigisaanik atorunnaarsinneqassaaq. Qaammatisiutit malillugit ukiumi 2014-imi aalisarnissami avaleraasartuunut nunatta imartaani pisarinqartussanut kiilumut akitsuutissap 1,50 kr.-iusup akilersinneqarnissaanik Naalackersuisunut maannakkut piginnaatitsissutaasooq taamaalilluni atorunnaassaaq.